

四庫全書

經部

欽定四庫全書

經部

周易傳義大全卷二十三

詳校官大理寺卿臣富炎泰

通政使司副使臣英瞻萊覆勘

覆校官中書臣田戶衡

校對官庶書士臣許兆椿

謄錄舉人臣陳綿貴

欽定四庫全書

周易傳義大全卷二十三

明 胡廣等 撰

繫辭下傳

八卦成列象在其中矣因而重之爻在其中矣

重直龍反

本義成列謂乾一兌二離三震四巽五坎六艮七坤

八之類象謂卦之形體也因而重之謂各因一卦而

以八卦次第加之為六十四也爻六爻也既重而後

卦有六爻也

朱子曰八卦所以成列乃是從太極兩儀四象漸次生出以至於此畫成之後

方見其有三才之象非聖人因見三才遂以已意思維而連畫三爻以象之也因而重之亦是因八卦之已成各就上面節次生出若旋生逐爻則更加三變方成六十四卦若併生全卦則只用一變便成六十四卦雖有遲速之不同然皆自然漸次生出各有行列次第畫成之後然後見其可盡天下之變不是聖人見下三爻不足以盡天下之變然後別生計較又并畫上三爻以盡之也此等皆是作易妙處方其畫時雖是聖人亦自不知衷面有許多巧妙奇特直是要人細心體認不可草草立說○問八卦成列只是說乾兌離震巽坎艮坤先生解云之類如何曰所謂成列者不止只論此橫岡若乾南坤北又是一列所以云之類○問象只是乾兌離震之象未說到天地雷風處否曰是然八卦是一項看象在其中又是逐箇看又問成列是自一奇一耦畫到三畫處其中遂一分便有乾兌離震之象否曰是○南軒張氏曰謂

在其中者言非自外至也○童溪王氏曰聖人因象以設卦則象在卦先設卦以立象則象在卦中

剛柔相推變在其中矣繫辭焉而命之動在其中矣

本義剛柔相推而卦爻之變往來交錯无不可見聖

人因其如此而皆繫之辭以命其吉凶則占者所值

當動之爻象亦不出乎此矣

或問變字是總卦爻有往來交錯者言動字是

專指占者所值當動底爻象而言否朱子曰變是就剛柔交錯而成卦爻上言動是專主當占之爻言如二爻變則占者以上爻為主這上爻便是動處如五爻變一爻不變則占者以不變之爻為主則這不變者便是動處也○節齋蔡氏曰剛柔爻之體相推謂剛推柔柔推剛也唯其相推故能成其變繫辭爻象

之辭即其變而命之故能鼓其動也

吉凶悔吝者生乎動者也

本義吉凶悔吝皆辭之所命也然必因卦爻之動而

後見

柴氏中行曰吉凶悔吝生乎動者主動爻而言也如情偽相感遠近相取好惡相攻皆是動也

○雲峰胡氏曰八卦成列即先天八卦橫圖也因而重之六十四卦橫圖也象非特天地山澤之類即八卦之畫成列而象即在畫矣未動之先有八卦之畫而未見八卦之交也因而重之爻在其中者爻之為言交也有交則有變故剛柔相推而變在其中變統指卦爻而言動專指所值之變爻而言也繫辭焉而命之則文王周公之易也○臨川吳氏曰此承前篇卒章言著卦之象辭變占曰在其中者凡四一象二

爻三變四動爻者辭也動則有吉凶悔吝之占焉前篇動者尚其變而此以動屬占者動因變而得占也

剛柔者立本者也變通者趨時者也

趣七
樹反

本義一剛一柔各有定位自此而彼變以從時

朱子曰此

兩句亦相對說剛柔者陰陽之質是移易不得之定體故謂之本若剛變為柔柔變為剛便是變通之用又曰變通便只是其往來者○節齋蔡氏曰剛柔者變通之本體變通者剛柔之時用○雲峰胡氏曰上繫曰剛柔者晝夜之象即此所謂立本曰變化者進退之象即此所謂趨時卦有卦之時爻有爻之時立本者天地之常經趣時者古今之通義○臨川吳氏曰剛柔之盡其體一定如木本之植立因著之變其用相通隨時所遇趨而就之剛或化柔柔或化剛此承剛柔相推變在共中之語而言著之變也

吉凶者貞勝者也

本義貞正也常也物以其所正為常者也天下之事

非吉則凶非凶則吉常相勝而不已也

朱子曰貞只是說他體處

常常如此○貞常也陰陽常只是箇相勝如子以前便是夜勝晝子以後便是晝勝夜○吉凶者貞勝者也這一句最好看這箇物事常在這裏相勝一箇吉便有一箇凶在後面來這兩箇不是一定住在裏底物各有其所正為常正是說他當然之理○進齊徐氏曰先言變動而後獨言吉凶悔吝生乎動者以動詳於變故也此言吉凶悔吝而後止言吉凶者以吉凶者悔吝之積也

天地之道貞觀者也日月之道貞明者也天下之動貞

夫一者也

觀官喚反
夫音扶

程子曰天地之道常垂象以示人故
曰貞觀日月常明而不息故曰貞明

本義觀示也天下之動其變无窮然順理則吉逆理

則凶則其所正而常者亦一理而已矣

朱子曰吉凶
常相勝不是

吉勝凶便是凶勝吉二者常相勝故曰貞勝天地之
道則常示日月之道則常明天下之動貞夫一者也
天下之動雖不齊常有一箇是底故曰貞夫一○雲
峰胡氏曰上繫於吉凶悔吝无咎之義發之詳矣獨
貞字未發故於下繫發之貞者正而固也本義曰正
而常何哉固者人事之當然常者天理之必然天下
之動非吉勝凶則凶勝吉二者常相勝而不已然亦
天下之正理也人之所為正則吉不正則凶雖其動

也不一而常有至一者存亦不外乎此至正之理而已天地日月之道亦猶是也

夫乾確然示人易矣夫坤隤然示人簡矣

確苦角反易以鼓反隤大

反回

本義確然健貌隤然順貌所謂貞觀者也

爻也者效此者也象也者像此者也

像音象

本義此謂上文乾坤所示之理爻之奇偶卦之消息

所以效而象之

或問爻也者效此者也是效乾坤之變化而分六爻象也者像此者也是

象乾坤之虛實而為奇偶朱子曰效此便是乾坤之理象只是像其奇偶

爻象動乎內吉凶見乎外功業見乎變聖人之情見乎

辭見賢
遍反

本義內謂著卦之中外謂著卦之外變即動乎內之

變辭即見乎外之辭

或問爻象動乎內吉凶見乎外或謂陰陽老少在分著揲卦之

時而吉凶乃見於成卦之後如何朱子曰也是如此然內外字猶言先後微顯○功業見乎變是就那動底爻見得這功業字似吉凶生大業之業猶言事變庶事相似○潘氏曰確然隤然乾坤之體也隤與頤同乾坤之所以示人者易而不難簡而不繁爻者倣此易簡者也象者像此易簡者也及其爻象動乎卦之內則吉凶見於事之外功業見於變通之間蓋動則有吉凶不動則吉凶无自而生變則有功業不變

則功業无自而成聖人之情則見爻辭象辭之間所以指人以所之也

天地之大德曰生聖人之大寶曰位何以守位曰仁何以聚人曰財理財正辭禁民為非曰義

本義曰人之人今本作仁呂氏從古蓋所謂非衆罔

與守邦

朱子曰天地以生物為心蓋天地之間品物萬形各有所事唯天則確然於上地則賡然

於下一无所為只以生物為事故易曰天地之大德曰生聖人之情見乎辭下連接說天地大德曰生此不是相連乃各自說去聖人之大寶曰位有德有位則事事做得○問人居臨天下大小大事只言理財正辭如何曰是因上文而言聚得許多人无財何以養之有財不能理又不得正辭便只是分別是非又

曰教化便在正辭裏面○理財正辭禁非是三事大
槩是辨別是非理財言你底還你我底還我正辭言
是底說是不是底說不是猶所謂正名○白雲郭氏
曰天地以生物為德故人以大德歸之聖人得崇高
之位然後成位乎中而贊化育故以位為大寶也大
寶者亦非聖人自以為寶也天下有生幸聖人之德
位以蒙其澤故天下以為寶也○臨川王氏曰生生
不已者天地之大德然天地生物生人又生與天地
合德之聖人命之居君師之位為人物之主而後能
使天地之所生得以各遂其生也苟或但有其德而
无其位則亦不能相天地而遂人物之生故位為聖
人之大寶大寶謂大可貴重守謂保有之必得衆人
之歸嚮乃能保有君師之位聚謂養之而使蕃盛衆
多也○平庵項氏曰財者百物總名皆民之所利也
正辭謂殊貴賤使有度明取予使有義辨名實使有
信蓋利之所在不可不導之使知義也禁民為非謂

憲禁令致刑罰以齊其不可導者也蓋養之教之而後齊之聖人不忍之政盡於此三者矣理財則易之備物致用也正辭則易之辨物正言也禁民為非則易之斷吉凶明失得外內使知懼也易之事業盡於此三者矣○雲峰胡氏曰上繫首章由乾之始坤之成說歸乾坤易簡之理下繫首章則由乾之易坤之簡說出天地大生之德得乾坤易簡之理如聖人乃可以成人之位行天地大生之德在聖人不可无大寶之位兩位字不同位乎天地之中人所同也而聖人能成之大寶曰位聖人之所獨也而天地實賴之上下繫之首章其有望於後世有德有位之聖人也如此哉

右第一章

本義此章言卦爻吉凶造化功業

雙湖胡氏曰按此章首論

重卦繫辭有爻象變動四者其下文皆是覆說
上面爻畫剛柔之變繫辭之動兩股其曰吉凶
悔吝生乎動者所以明繫辭焉而命之動在其
中之意其曰剛柔立本變通趨時者所以明剛
柔相推變在其中之意而自吉凶貞勝以下又
申明吉凶悔吝生乎動一句謂天地之道以貞
而勝日月之道以貞而明天下之動亦唯當一
以貞而勝之而已大抵易為斯人作卦爻辭无
非所以明失得之報故說吉凶為甚詳也次論
乾坤易簡對天地德生說作易聖人以憂世之
情發明易簡於卦爻之辭用易聖人有御世之
位推行德生於仁義之道前一股是易後一股
是用易要之乾坤即天地也易簡即大德之生
也作易聖人之情見乎辭用易聖人以仁守其
位无非所以為斯人而已耳合
兩節而觀一章之旨可見矣

古者包犧氏之王天下也仰則觀象於天俯則觀法於地觀鳥獸之文與地之宜近取諸身遠取諸物於是始作八卦以通神明之德以類萬物之情

王于况反

程子曰近取諸身一身之上百理具備甚物是沒底背在上故為陽胃在下故為陰至如男女之生已有此象天有五行亦有五藏心火也著些天地間熱氣乘之則便須發燥肝木也著些天地風氣乘之則便須怒推之五藏亦然

本義王昭素曰與地之間諸本多有天字俯仰遠近所取不一然不過以驗陰陽消息兩端而已神明之

德如健順動止之性萬物之情如雷風山澤之象

朱子

曰仰則觀象於天一段只是陰陽奇耦聖人有這許多般事物都不出陰陽兩字便是河圖洛書也只是陰陽○觀鳥獸之文與地之宜那時未有文字只是仰觀俯察而已想得聖人心細雖鳥獸羽毛之微也盡察得有陰陽今人心龐如何察得或曰伊川見兔曰察此亦可以畫卦便是此義曰就這一端上亦可

以見凡草木禽獸无不有陰陽鯉魚脊上有三十六鱗陰數龍脊上有八十一鱗陽數龍不曾見鯉魚必

有之又龜背上文中間一簇成五段兩邊各插四段共成八段子八段之外兩邊周圍共有二十四段中間五段者五行也兩邊插八段者八卦也周圍二十四段者二十四氣也箇箇如此又如草木之有雌雄銀杏桐栲栳牡麻竹之類皆然又樹木向陽處則堅實其背陰處必虛軟男生必伏女生必偃其死於水

也亦然蓋男陽氣在背女陽氣在腹也○以通神明之德以類萬物之情盡于八卦而震巽坎離艮兌又總於乾坤曰動曰陷曰止皆健底意思曰入曰麗曰說皆順底意思聖人下此八字極狀得八卦性情盡○問本義謂伏羲作易驗陰陽消息兩端而已此語最盡曰陰陽雖是兩箇字然却是一氣之消息一進一退一消一長進處便是陽退處便是陰長處便是陽消處便是陰只是這一氣之消息做出古今天地間無限事來所以陰陽做一箇說亦得做兩箇說亦得○柴氏中行曰仰觀象於天而參驗於鳥獸之文於是得陰陽之理俯觀法於地而參驗於地宜於是得剛柔之情近取諸身遠取諸物而知理之所在物我无二三才之道默會於心要不出乎陰陽二端相變而已○平庵項氏曰象以氣言屬陽法以形言屬陰鳥獸之文謂天產之物飛陽而走陰也土地所宜謂地產之物木陽而草陰也○節齋蔡氏曰聖人所

畫之卦精可以通神明之德粗可以類萬物之情神
明之德不可見者也故曰通萬物之情可見者也故
曰類○雲峰胡氏曰神明之德不外乎健順動止
八者之德萬物之情不止乎天地雷風八物之情

作結繩而為網罟以佃以漁蓋取諸離

音古

程子曰聖人制器不待見卦而後知象以
衆人由之而不能知之故因卦以示之耳

本義兩目相承而物麗焉

朱子曰蓋取諸等字乃模
樣是恁地蓋字便是一箇

半間半界底字又曰據十三卦取象蓋取之離者言
繩為網罟有離之象非觀離而始有此也○誠齋楊
氏曰教民肉食自包犧始○南軒張氏曰古者禽獸
多而人民少故伏羲氏為之網罟以佃以漁非徒使
民皆知鮮食之利抑亦去其害而安其居也取諸離
者蓋離以一陰麗乎二陽之間則鳥獸之麗乎網魚

鼈之麗乎罟其義可推矣○厚齋馮氏曰離有二義
曰象曰理理謂麗也謂鳥獸魚鼈麗乎網罟也象謂
虛中網罟之日虛也○雲峰胡氏曰民以食為先自
古未有耕種則鮮食乃其先也伏羲氏非取諸離然
後為網罟特網罟兩目相承而物麗自有
似於離之象焉耳蓋之言疑辭也下倣此

包犧氏沒神農氏作斲木為耜揉木為耒耨之利以

教天下蓋取諸益

斲陟角反耜音似耒
力對反耨奴豆反

本義二體皆木上入下動天下之益莫大於此

或問
上入

下動於取象有所未曉朱子曰耜乃今之鍤胡瓜反
鑿七消反耒乃鍤柄雖下入畢竟是上而用力方得
入○沙隨程氏曰飛走之類實害禾稼唯網罟佃漁
之制立然後耒耨之利見於天下○誠齋楊氏曰教

民粒食自神農始○節齋蔡氏曰耜耒首也斲木之銳而為之耒耜柄也揉木使曲而為之○壘山謝氏曰耒耜者今謂之犂曲木在上俗名犂衝即耒也斲削二片在下以承鐵二片俗呼犂壁即耜也○漢上朱氏曰炎帝時民厭鮮食而食草木之實於是始為耒耜以教天下故曰神農耨耜耘除草也○雲峰胡氏曰自古未有牛耕神農教民耒耜其動也其下之耜而所以入之者在上之耒於益之卦德上入下動蓋有合焉況為天下之益於卦名又有合也

日中為市致天下之民聚天下之貨交易而退各得其
所蓋取諸噬嗑

本義日中為市上明而下動又借噬為市嗑為合也

開封耿氏曰有菽粟者或不足乎禽魚有禽魚者或不足于菽粟罄者无所取積者无所散則利市不布養不均矣于是日中為市焉日中者萬物相見之時也當萬物相見之時而致天下之民聚天下之貨使遷其有无則得其所矣○毋陽都氏曰五十里為市而各致其民則天下之民无不致矣市各聚其貨則天下之貨无不聚矣於是以其所有易其所无交易而退各得其所則動而噬嗑以為養蓋取諸噬嗑也○節齋蔡氏曰天下之民不同業天下之貨不同用致而聚之噬而嗑之義○進齋徐氏曰噬嗑離明在上日中象震動於下致民交易於市之義○合沙鄭氏曰十三卦始離次益次噬嗑所取者食貨而已食貨者生民之本也

神農氏沒黃帝堯舜氏作通其變使民不倦神而化之

使民宜之易窮則變變則通通則久是以自天祐之古

无不利黃帝堯舜垂衣裳而天下治蓋取諸乾坤

治去聲

程子曰聖人生化如禹之治水順則當順之治則順治之古之伏羲豈不能垂衣裳必待堯舜然後垂衣裳據如此事只是一箇聖人都做得了然必須數世然後成亦因時而已又曰識變知化為難古今風氣不同故器用亦異是以聖人通變使民不倦各隨其時而已矣後世雖有作者虞舜為弗可及矣蓋當是時風氣未開而虞舜之德又如此故後世莫可及也若三代之治後世決可復不以三代為治者終苟道也

本義乾坤變化而无為

朱子曰黃帝堯舜氏作到這時候合當如此變易窮則變

道理亦如此垂衣裳而天下治是大變他以前底事了通其變須是得一箇人通其變若聽其自變如何得○南軒張氏曰作衣裳以被之於身垂綃為衣其色元而象道襍幅為裳其色纁而象事法乾坤以示人使民知君臣父子尊卑貴賤莫不各安其分也○誠齋楊氏曰所謂衣裳即舜所謂古人之象五色作服者是也蓋始於黃帝備於堯舜○墨山謝氏曰乾天在上衣象衣上間而圓有陽奇象坤地在下裳象裳下兩股有陰偶象上衣下裳不可顛倒使人知尊卑上下不可亂則民志定天下治矣○建安丘氏曰十三卦制器而尚象皆通變宜民之事特於黃帝堯舜氏言之者犧農之時人害雖消而人文未著衣食雖足而禮義未興為之君者方且與民並耕而食饗殮而治虫虫蠹蠹蓋未識所謂上下尊卑之分於是三聖人者仰觀俯察體乾坤之象正衣裳之儀使君臣分義截然於天高地下之間天下其有不治乎斯

時也其世道一新之會而黎民於變之機也○雲峰
胡氏曰食貨既足不可无禮於是垂衣裳以明尊卑
貴賤之分而於乾坤之尊卑有合然垂衣
裳而天下治即乾坤之變化而无為也

剡木為舟剡木為楫舟楫之利以濟不通致遠以利天

下蓋取諸渙

剡口姑反
剡以冉反

本義木在水上也致遠以利天下疑衍

南軒張氏曰
衣裳之垂固

欲遠近之民下觀而化然川途之險阻則有所不通
唯夫舟楫之利既興則日月所照霜露所墜莫不拭目
觀化天下如一家中國如一人矣是以剡其木而
中虛剡其楫而末銳舟所以載物而楫所以進舟致
遠以利天下而取諸渙者蓋渙之成卦
上巽下坎象曰利涉大川乘木有功也

服牛乘馬引重致遠以利天下蓋取諸隨

程子曰服牛乘馬皆因其性而為之胡不乘牛而服馬乎理之所不可也

本義下動上說

漢上朱氏曰上古牛未穿馬未絡至是始服乘之○鄱陽董氏曰服牛乘

馬穿鼻絡頭雖人為也亦各因其天而任之故取諸隨○安定胡氏曰隨者是動作必隨於人以之遠則隨於人以之近則亦隨於人○李氏曰剡木為舟剡木為楫因植物之材而川通矣服牛乘馬引重致遠因動物之性而途通矣牛以順為道故服而馴之以引重馬以行為事故乘而駕之以致遠牛非不可以致遠於引重為力而已馬非不可以引重於致遠為敏而已引重謂之引以有所進為義致遠謂之致以有所至為義

重門擊柝以待暴客蓋取諸豫

重直龍反
柝他洛反

本義豫備之意

朱子曰重門擊柝以待暴客只是豫備之意却須待用互體推良為門闕

雷震乎外之義刻木為矢弦木為弧只是賒乖故有威天下之象亦必待穿鑿附會就卦推出制器之義殊不知卦中但有此理而已故孔子各以蓋取諸某卦言之亦曰其大意云爾漢書所謂獲一角獸蓋麟云皆疑辭也○漢上朱氏曰上古外戶不閉禦風氣而已至是始有暴客之防○揚氏曰川途既通則暴客至矣又不可无禦之之術故取諸豫重門以禦之擊柝以警之則暴客无自而至二陰在前重門之象也一陽在下擊柝之象也三陰安於內說豫之象也○涑水司馬氏曰豫者怠惰之意擊柝者所以警怠也

情也

斷木為杵掘地為白白杵之利萬民以濟蓋取諸小過

斷丁緩反杵昌
呂反掘其曰反

本義下止上動

誠齋楊氏曰耒耜耕稼之始白杵脫粟之始○建安丘氏曰以象言之上

震為木下艮為土震木上動艮土下止杵白治米之
象○進齋徐氏曰民粒食矣又杵白以治之而使精
小有所過而
利人者也

弦木為弧剡木為矢弧矢之利以威天下蓋取諸睽

本義睽乖然後威以服之

南軒張氏曰外有擊柝以防暴客內有杵白以治粒

食而无以威其不軌則雖有險不能守雖有粟而不得食此弧矢之利不可緩也○臨川吳氏曰弧木弓

也兵器不一弓矢所及者遠為長兵威天下者示有警備而使之畏也○漢上朱氏曰知門柝而不知弧矢之利則威天下者有未盡故教之以弧矢之利○進齋徐氏曰其害之大者以重門擊柝不足以待之故必有弧矢以威之利天下者仁也威天下者義也

上古穴居而野處後世聖人易之以宮室上棟下宇以待風雨蓋取諸大壯

程子曰上古之時民皆巢居而穴處後世易之以棟宇而不以巢居穴處為可變者以棟宇之利故也

本義壯固之意

節齋蔡氏曰棟屋脊樑也宇椽也棟直承而上故曰上棟宇兩垂而下故

曰下宇棟取四剛義宇取二柔義○涑水司馬氏曰風雨動物也風雨動於上棟宇建於下大壯之象也

○進齋徐氏曰冬穴居无以待風夏野處无以待雨故宮室不得不興震風凌雨然後知厦屋之為帡幪故棟宇不可不固大壯之意也

古之葬者厚衣之以薪葬之中野不封不樹喪期无數

後世聖人易之以棺槨蓋取諸大過

衣於既反

本義送死大事而過於厚

南軒張氏曰君子不以天下儉其親於此而過无害

也○丹陽邵氏曰杵臼棺槨所以使民養生送死无憾所以依於人者過厚也然養生不足以當大事故取小過之義而已送死足以當大事故取大過之義焉○合沙鄭氏曰大壯外震震動也風雨飄搖之象大過內巽巽入也殯葬入土之象

上古結繩而治後世聖人易之以書契百官以治萬民
以察蓋取諸夬

本義明決之意

朱子曰上古結繩而治後世聖人易之以書契天下事有古未之為而後

人為之固不可无者此類是也又曰結繩今溪洞諸蠻猶有此俗又有刻版者凡年月日時以至人馬糧草之數皆刻版為記都不相亂○問六十四卦重於伏義果否曰此不可考或曰表帛市井已取重卦之象則疑伏義已重卦或者又謂此十三卦皆云蓋取則亦疑辭未必因見此卦而制此物也今无所考但既有八卦則六十四卦已在其中此則不可不知耳○進齋徐氏曰上古民淳事簡事之小大唯結繩以識之亦足以為治至後世風俗偷薄欺詐日生而書契不容不作矣書文字也契合約也言有不能記者

書識之事有不能信者契驗之取明決之義蓋六乃君子決小人之卦而造書契者亦所以決去小人之偽而防其欺也○開封耿氏曰已前不云上古已下三事或言古與上不同者蓋未造此器之前更无餘物之用非是後世以替前物故不言上古也此以下三事皆是未造此物之前已更別有所用今將後用而代前用故本之云上古及古者

右第二章

本義此章言聖人制器尚象之事

息齋余氏曰卜筮之說詳

於上繫制器之說詳於下繫○潛室陳氏曰十三卦取象說上古雖未有易之書元自有易之理故所作事暗合易書即邵子所謂畫前之易是也○開封耿氏曰十三卦之辭或言利或不

言利何也網罟非不為利也然必耒耜枿白而後能裕萬民之食是則網罟之利不足言而耒耜枿白之利大矣所以言利也門枿非不為利也然門枿則能保其內使暴客不能入而已弧矢則又能威其外使暴客不能至是則門枿之利不足言而弧矢之利大矣所以言利也獨於舟楫馬牛言利天下者舟楫馬牛之利无所不通可以周天下故也○荀軒程氏曰網罟耒耜所以足民食交易舟車所以通民財枿白弧矢所以利民用衣裳以華其身宮室以定其居門枿以衛其生棺槨以送其死凡所以為民生利用安身養生送死之道已无遺憾矣然百官以治萬民以審卒歸之失之書契何也蓋器利用便則巧偽生憂患作聖人憂之故終之以書契之取象書契可以代忘言之兌乾天可以防書契之偽其視網罟等象雖非一時之利實萬世

之大利也故結繩初易為網罟終易為書契聖人以定大業斷大疑悉於書契乎觀百官治萬民審誠非書契不可也十三卦終以大卦之取象聖人之意深矣○雲峰胡氏曰舟楫取渙以卦象取也服乘取隨白杵取過以卦德取也豫備賁取壯固夬決大過過於厚皆以卦義取也諸家往往皆以互體推之未免穿鑿殊不知夫子之意亦不過謂聖人之制此器也此卦之中自有此理而已蓋之一字疑取諸此而非必取之此也自天祐之吉尤不利上傳為君子之用易者言之下傳又為聖人之通變者言之何也天者理而已聖人之制器不能先天而強為不能後天而不為非一時之所可為也非一人之所能為也皆天理之自然者也所以亦曰自天祐之○誠齋楊氏曰嗚呼鴻荒之世民之初生非若今日之備器用便起居具服食也自斯人

之飢而未知佃漁也聖人於是乎作網罟自斯人之肉食而未知粒食也聖人於是乎作耒耜自斯人之食貨或有餘或不足之偏備也聖人於是乎作市易自斯人之寒而衣皮未知織紵之制也聖人於是乎作衣裳自斯人之出入庀於川隔而道斷也聖人於是乎作舟楫自斯人之疲於負擔而趺於遠塗也聖人於是乎作輜轡自斯人之虞於寇攘而懈於守禦也聖人於是乎作門柝自斯人之知有排擣而未知有春榆也聖人於是乎作柝自斯人之无爪牙以自濟而憂於搏噬也聖人於是乎作弧矢自斯人之穴處而病於溼墊也聖人於是乎作宮室自斯人之死而憂於藁葬之掩也聖人於是乎作棺槨自斯人之窮於結繩而相欺无藉也聖人於是乎作書契然非聖人之私知也取於十三卦之象然後成亦非一聖人之能為也歷五

聖人而後備蓋斯人生生之道若此其難而聖人所以生生斯人者若此其勞也故曰如古之元聖人人之類滅久矣○西山真氏曰此章所列卦象之意皆物理之自然者也有自然之象則有自然之理人之所共睹也然常人見其象而昧其理唯聖人見是象則知是理知是理則制是器人皆謂備物致用立成器以利天下出於聖人之心思不知聖人亦因其所固有而已學者誠能虛心以體天下之物則精義妙道莫不昭昭然接於吾之心目然後真知道器之相合而顯微之元問也

是故易者象也象也者像也

本義易卦之形理之似也

朱子曰易者象也象也者像也只是彷彿說不可求

得太深○易者象也是總說起言易不過只言陰陽之象下云像也材也天下之動也則皆是說那上面象字○問易者象也象也者像也四句莫只是解箇象字否曰是解易字像又是解象字材又是解象字末句意亦然○蔡氏攸曰昔者聖人之作易也始畫八卦而象在其中象與卦竝生以寓天下之賾故曰易者象也蓋俯仰以觀遠近以取神明之德可通鬼神之情狀可得而況於人乎況於萬物乎及因而重之發揮於剛柔而生爻則擬諸其形容者其變不一而象亦為之滋矣故邑屋宮庭舟車器械服帶簪履下至鳥獸蟲魚金石草木之類皆在所擬至纖至悉无所不有所謂其道甚大百物不廢者此也其在上古尚此以制器其在中古觀此以繫辭而後世之言易者乃曰得意在忘象得象在忘言一切指為魚兔筌蹄殆非聖人作易前民用以教天下之意也

彖者材也

本義彖言一卦之材

漢上朱氏曰卦有剛柔材也有是時有是象必有是才以濟之

才與時會斯足以成務矣

爻也者效天下之動者也

本義效放也

漢上朱氏曰天下之動其微難知有同處一時同處一事所當之位有不同焉

則進退趨舍殊塗矣故曰爻也者效天下之動也

是故吉凶生而悔吝著也

本義悔吝本微因此而著

南軒張氏曰易者象也象也者像此者也謂之象則

言其象之材而已謂之爻則故其象之變而已至於
吉凶則悔吝之著也故悔者有改過之意而吉則悔
之著也吝者有文過之意而凶則吝之著也○雲峰
胡氏曰至著者象至微者理易之象理之似也象者
材也材者象之質爻效天下之動動者象之變悔吝
在心未著吉凶在事已著吉者悔之著凶者吝之著
也

右第三章

雙湖胡氏曰此章說卦象及象辭爻辭
論人事之悔吝至吉凶而始著蓋卦爻辭

辭无非所以明得失之報欲人觀象玩辭之際
知有悔心而不容於改過庶幾有吉而亢凶耳

陽卦多陰陰卦多陽

本義震坎艮為陽卦皆一陽二陰巽離兌為陰卦皆

一陰二陽

潛室陳氏曰二耦一奇即奇為主是為陽卦二奇一耦即耦為主是為陰卦故曰陽

卦多陰陰卦多陽

其故何也陽卦奇陰卦耦

本義凡陽卦皆五畫凡陰卦皆四畫

三山林氏曰陽卦宜多陽而多

陰陰卦宜多陰而多陽何也蓋陽卦之數必五奇數也奇則陰畫自多陰卦之數必四耦數也耦則陽畫自多其多陰多陽皆自然而然非人力所能參也○雙湖胡氏曰嘗推八卦奇耦之畫每卦雖各得其三而合之則為六乾坤合為六震巽合亦六坎離合亦六艮兌合亦六適符老陰掛扐之用數總之則四六二十四畫而成老陰過揲之數若尤與於老陽之數矣然以陽卦五畫陰卦四畫觀之奇耦之合又皆老

陽掛拂之用數故乾坤合為九震巽合亦九坎離合亦九艮兌合亦九悉數之實成三十六而為老陽過揲之數焉此乾坤用九用六其數默見於卦畫之可推者如此雖出於偶然其實亦莫非自然之妙也豈可以人力參哉

其德行何也陽一君而二民君子之道也陰二君而一

民小人之道也

行下孟反

本義君謂陽民謂陰

朱子曰二君一民試教一箇民而有兩箇君看是甚模樣○柴

氏中行曰一君二民道大而公君子之道也二君一民道小而私小人之道也卦體乎君子小人之道而象象爻所以發明此道者也然在諸卦為陽卦者未必皆君子之道為陰卦者未必皆小人之道蓋此特

借陰陽二卦之體以明君子小人之道不同耳非可
一例成卦也爻象象乃是發明此道非發明此卦也
○雲峰胡氏曰論其故則陽卦五畫陰卦四畫陽與
陰一定之分固如此論其德行則陽為君陰為民陽
為君子陰為小人易
之扶陽抑陰又如此

右第四章

雙湖胡氏曰此章專以八卦
陰陽畫數分君子小人之道

易曰憧憧往來朋從爾思子曰天下何思何慮天下同
歸而殊塗一致而百慮天下何思何慮

憧音
冲

本義此引咸九四爻辭而釋之言理本无二而殊塗
百慮莫非自然何以思慮為哉必思而從則所從者

亦狹矣

朱子曰所謂天下何思何慮正謂雖萬變之紛紛而所以應之各有定理不假思慮而知

也問天下同歸而殊塗一致而百慮何故不云殊塗而同歸百慮而一致曰也只一般但他是從上說下自合如此說感應之理本不消思慮空費思量空費計較空費安排只順其自然而已○臨川吳氏曰思者心之用也慮者謀度其事也心體虛空如止水明鏡未與物接寂然不動何思之有既與物接應之各有定理何慮之有理之在心者同因事之不同而所行之塗各殊理之在心者一因事之不一而所發之慮有百塗雖殊慮雖百而應事之理則同而一也故定心應事動而无動則亦何思何慮之有此人心定應寂然之感也若九四之憧憧則豈如是人乎○柴氏中行曰言天地萬物皆本於天理之自然人常棄私欲而循天理也所謂理夫子之一貫子思之誠曾子之守約是也同歸而殊塗天下元二理也一致而百

慮天下无二心也致謂極致明其所同歸極其所一
致則天下雖塗殊慮百无不應者何以思慮為哉○
進齋徐氏曰塗雖殊而歸同則往來自不容无而加
之憧憧則私矣慮雖百而致一則思亦人心所當有
而局於朋從則狹矣人於此但
當以貞守之不必自為紛紛也

日往則月來月往則日來日月相推而明生焉寒往則
暑來暑往則寒來寒暑相推而歲成焉往者屈也來者
信也屈信相感而利生焉

信音中

本義言往來屈信皆感應自然之常理加憧憧焉則
入於私矣所以必思而後有從也

朱子曰日往則月來一說乃承上文

憧憧往來而言往來皆人所不能无者但憧憧則不可○誠齋楊氏曰觀諸日今夕之往所以為來朝之來觀諸月今夕之來所以為來朝之往蓋前之屈乃後之信也觀諸寒暑折膠之寒不生於寒而生於烈日流金之暑流金之暑不生於暑而生於堅冰折膠之寒蓋今之信乃昔之屈也○臨川吳氏曰因日之往而有月之來因月之往而有日之來二曜相推以相繼則明生而不墮因寒之往而有暑之來因暑之往而有寒之來二氣相推以相代則歲成而不缺往者之屈感來者之信來者之信又感往者之屈而有明生歲成之利此天道往來自然之感也若九四之往來則豈如是乎○張子曰屈信相感而利生焉感以誠也情偽相感而利害生雜以偽也

尺蠖之屈以求信也龍蛇之蟄以存身也精義入神以

致用也利用安身以崇德也

蠖紀
縛反

本義因言屈信往來之理而又推以言學亦有自然

之機也精研其義至於入神屈之至也然乃所以為

出而致用之本利其施用无適不安信之極也然乃

所以為入而崇德之資内外交相養互相發也

朱子曰

蠖之屈以求信也龍蛇之蟄以存身也屈信消長閤
關往來其機不曾停息大處有大閤關小處有小閤
關大處有大消息小處有小消息此理萬古不易如
目有瞬時亦豈能常瞬定又須開不能常開定又須
瞬瞬了又開開了又瞬至纖至微无時不然○問此
章言萬變雖不同然皆一理之中所自有知不用安

排曰此只說得一頭尺蠖若不屈則不信得身龍蛇若不蟄則不伏得氣如何存得身精義入神疑與行處不相關然而見得道理通徹乃所以致用利用安身亦疑與崇德不相關然而動作得其理則德自崇天下萬事萬變无不有感通往來之理又曰尺蠖屈便要求信龍蛇蟄便要存身精研義理无絲毫之差入那神妙處這便是要出來致用外面而用得利而身安乃所以入來自崇已德致用之用即利用之用所以橫渠云精義入神事豫吾內求利吾外利用安身素利吾外致養吾內事豫吾內言曾到這裏而來又曰尺蠖屈得一寸便能信得一寸來許他之屈乃所以為信龍蛇於冬若不蟄則凍殺了其蟄也乃所以存身也精義入神乃所以致用也利用安身乃所以崇德也欲罷不能如人行步左腳起了不由得右腳不起所謂過此以往未之或知也若到那窮神知化則須是德之盛也方能○精義二字所謂義者宜而

已物之有宜有不宜事之有可有不可吾心處之知其各有定分而不可易所謂義也精義者精諸此而已所謂精云者猶曰察之云耳精之至而入於神則於事物之所宜毫釐委曲之間无所不悉有不容言之妙矣此所以致用而用无不利也又曰義至於精則應事接物問无一非義不問小事大事卜變萬化改頭換面出來自家應付他如利刀快劍相似迎刃而解件件判作兩邊去○且如精義入神如何不思那致用底却不必思致用底是事功是效驗○利用安身今人循理則自然安利不循理則自然不安利○息齋余氏曰既曰屈信相感而利生矣恐人知信之利而不知屈之所以利也故以尺蠖龍蛇明之其為人切矣○臨川吳氏曰夫子既以屈信二字釋往來之相感復以物理之屈信聖學之屈信言之而廣其意尺蠖不屈則其行不能信既信而再行則又屈也龍蛇不蟄則其來歲之身不能奮既奮於來歲則

又勢也此物理之屈信相感也義理精明則應物有定而神不外馳入者无出内之屈也而乃所以致極其外之用屈之感信也且用宜利則每事曲當而身之所處隨寓而安外之信也而乃所以增崇其内之德信之感屈也此聖學之屈信相感也因言聖學之交相養互相發工力至此則蔑以加矣

過此以往未之或知也窮神知化德之盛也

本義下學之事盡力於精義利用而交養互發之機自不能已自是以上則亦无所用其力矣至於窮神知化乃德盛仁熟而自致耳然不知者徃而屈也自致者來而信也是亦感應自然之理而已張子曰氣

有陰陽推行有漸為化合一不測為神此上四節皆

以釋咸九四爻義

朱子曰窮神知化德之盛這德字只是上面崇德之德德盛後便能

窮神知化便如聰明睿知皆由此出自誠而明相似又曰精義入神以致用也利用安身以崇德也過此以往未之或知也窮神知化德之盛也只是這一箇非於崇德之外別有箇德之盛也做來做到徹處便是○本之或知是到這裏不可奈何窮神知化雖不從這裏出來然也有這箇意思○神化二字雖程子說得亦不甚分明唯是橫渠推出來推行有漸為化合一不測為神又曰一故神兩在故不測兩故化○窮神知化是逐些子挨將去底一日復一日一月復一月節節挨將去便成一年神是一箇物事或在彼或在此當其在陰時全體在陰在陽時全體在陽都只是這一物兩處都在不可測故謂神橫渠

言一故神兩故化又注云兩在故不測這說得甚分
曉○此章解成九四據爻義看上爻說貞吉悔亡貞
字甚重程子謂聖人感天下如雨暘寒暑无不通无
不應者貞而已所以感人者果貞矣則吉而悔亡蓋
天下本无二理果同歸矣何患乎殊塗果一致矣何
患乎百慮所以重言何思何慮也如日月寒暑之往
來皆是自然感應如此日不往則月不來月不往則
日不來寒暑亦然往來只是一般往來但憧憧之往
來者患得患失既要感這箇又要感那箇便自憧憧
忙亂用其私心而已屈信相感而利生焉者有書必
有夜設使長長為晝而不夜則何以息夜而不晝焉
得有此光明泰氣同是和好只有春夏而无秋冬萬
物何以成一向秋冬而无春夏又何以生屈信往來
之理所以必待迭相為用而使利所由生春秋冬夏
只是一箇感應所應復為感所感復為應也春夏是
一箇大感秋冬則必應之而秋冬又為春夏之感以

細言之則春為夏之感夏則應春而又為秋之感秋為冬之感冬則應秋而又為春之感所以不窮也尺蠖不屈則不可以信龍蛇不蟄則不可以藏身今山林冬暖而蛇出者徃徃多死此則屈信徃來感應必然之理夫子因徃來兩字說得許多大又推以言學所以內外交相養亦只是此理而已橫渠曰事豫吾內求利吾外索利吾外致養吾內此下學所當致力處遇此以上則不容計較所謂窮神知化乃養盛自致非思勉所及此則聖人事矣○天下何思何慮一段此是言自然而然如精義入神自然致用刊用安身自然崇德○天下何思何慮一句便是先打破那箇思字却說同歸殊塗一致百慮又再說天下何思何慮謂何用如此憧憧徃來而如此朋從之思也日月寒暑之徃來尺蠖龍蛇之屈信皆是自然底道理不徃則不來不屈則亦不能信也今之為學亦只是如此精義入神用力於內乃所以致用乎外利用安

身求利於外乃所以崇德乎內只是如此做將去雖
至於窮神知化地位亦只是德盛仁熟之所致何思
何慮之有○雲峰胡氏曰天下何思何慮一語所以
破思慮之感息憧憧之思也天下間凡一往一來皆
感應自然之常理非唯日月寒暑如此以吾之學言
之精義以致用利用以崇德亦有自然屈信之理至
於窮神知化而德之盛皆自然而已矣
皆非思慮所及故曰天下何思何慮

易曰困于石據于蒺藜入于其宮不見其妻凶子曰非
所困而困焉名必辱非所據而據焉身必危既辱且危
死期將至妻其可得見邪

本義釋困六三爻義

或問非所困而困焉名必辱大意謂石不能動底物自是不須

去動他若只管去用力徒自困耳朱子曰此又大意謂不可做底便不可入頭去做又曰且以人事言之有著力不得處若只管著力去做少間去做不成他人便道自家无能便是辱了名○南軒張氏曰有應於上將以求名今困於石此非所困而困焉名必辱也有依於下得以安身今據于蒺藜非所據而據焉身必危也在困之時名辱身危有死之理此身不行道雖妻且不可見宜乎凶也○誠齋楊氏曰君子有不幸之困无以致之在陳畏匡是已故名不辱而身不危小人无幸免之困為不善以致之以其非所據而據是以非所困而困尚可保而保其名保其身保其家保其妻子乎

易曰公用射隼于高墉之上獲之无不利子曰隼者禽也弓矢者器也射之者人也君子藏器於身待時而動

何不利之有動而不括是以出而有獲語成器而動者

也

射食亦反集恤
允反括古活反

本義括結礙也此釋解上六爻義

朱子曰張敬夫說
易謂只依孔子繫

辭說便了如說公用射隼至成器而動者也只如此
說便了固是如此聖人之意只恁地說不得緣在當
時只理會得象數故聖人明之以理又曰公用射隼
孔子是發出言外之意○漢上朱氏曰藏可用之器
待可為之時動无結礙出則有獲
唯乘屈信之理而其用利者能之

子曰小人不恥不仁不畏不義不見利不勸不威不懲
小懲而大誡此小人之福也易曰履校滅趾无咎此之

謂也

本義此釋噬嗑初九爻義

厚齋馮氏曰不以不仁為恥故見利而後勸於為仁

不以不義為畏故畏威而後懲於不義○漢上朱氏曰小人不恥不仁故不畏不義陷於死亡辱及其先恥孰大焉雖愚也而就利避害與人同故見利而後勸威之而後懲小懲大誠猶為小人之福况真知義乎

善不積不足以成名惡不積不足以滅身小人以小善為无益而弗為也以小惡為无傷而弗去也故惡積而不可掩罪大而不可解易曰何校滅耳凶

何河可反
去羌呂反

本義此釋噬嗑上九爻義

漢上朱氏曰精於義者豈一日積哉彼積不善而滅

其身者不知小善者大善之積也○融堂錢氏曰積字宜玩凡善惡未有不有積而成也○誠齋楊氏曰

夫子釋噬嗑初上之辭謂懲惡在初改過在小○建安丘氏曰惡小而不能懲則罪大而不可解猶滅趾

不防而至於滅耳也烏得而不凶

子曰危者安其位者也亡者保其存者也亂者有其治者也是故君子安而不忘危存而不忘亡治而不忘亂是以身安而國家可保也易曰其亡其亡繫于苞桑

本義此釋否九五爻義

或問危者以其位為可安而不知戒懼故危亡者以其存

為可常保是以亡亂者有其治是自有其治如有其善之有是以亂朱子曰某舊也如此說看來保字說得較牽強只是常有危亡與亂之意則可以安其位保其存有其治○臨川吳氏曰自處於危者乃自安其位之道也凜乎若將亡將亂者乃所以常保其存常有其治也九五將休矣而不忘戒懼如此蓋於安存治之時而能不忘危亡亂之禍是以身之位得以安而國家可保其久存長治也○張子曰明君子之幾見

子曰德薄而位尊知小而謀大力小而任重鮮不及矣

易曰鼎折足覆公餗其形渥凶言不勝其任也

知音智鮮仙集

反折之設反餗音連渥於角反勝音升

本義此釋鼎九四爻義

漢上朱氏曰位欲當德謀欲量知任欲稱力三者各得其

實則利用而安身小人志在於得而已以人之國微作萬一鮮不及禍自古一敗塗地殺身不足以塞其責者本於不知義而已○融堂錢氏曰古之人君必量力度德而後授之官古之人臣亦必度力度德而後居其任雖百工胥史且猶不苟況三公乎為君不明於所擇為臣不審於自擇以至亡身危主誤國亂天下皆由不勝任之故可不戒哉○誠齋楊氏曰聖人亦豈責天下之人皆德厚而不薄皆知大而不小皆力多而不少哉亦責其貪位而不量已過分而不勝任以至覆人之鉢敗已之身爾

子曰知幾其神乎君子上交不諂下交不瀆其知幾乎幾者動之微吉之先見者也君子見幾而作不俟終日

易曰介于石不終日貞吉介如石焉寧用終日斷可識

矣君子知微知彰知柔知剛萬夫之望

先見之見
賢適反

程子曰先見則吉可知不見則致凶見幾而作不俟
終日智之同也介如石理素定也理素定故見幾而

作何俟
終日哉

本義此釋豫六二爻義漢書吉之之間有凶字

朱子曰知

幾其神乎便是這事難如那有道危言危行那危道
危行言危今有一樣人其與頭者又言過於直其畏
謹者又縮做一團更不敢做事說話此便是曉不得
那幾若知幾則自中節无此疾矣君子上交不諂下
交不瀆蓋上交貴於恭遜恭則便近於下交貴於
和易和則便近於瀆蓋恭與諂相近和與瀆相近只

爭些子便至于流也人曰上交近於詔下交近於瀆如此當知幾纔過些子便不是知幾周子所謂幾善惡者此也又曰君子上交不詔下交不瀆他這下而說幾最要着箇幾字只爭些子凡事未至而空說道理易見事已至而顯然道理也易見唯事之方萌而動之微處此最難見問幾者動之微何以獨於上下交言之曰上交要恭遜纔恭遜便不知不覺有箇詔底意思在裏頭下交不瀆亦是如此所謂幾者只纔覺得近詔近瀆便勿令如此便是知幾幾者動之微吉之先見者也漢書引此句吉下有凶字當有凶字又曰凡人上交必有些小取來底心下交必有些小簡做底心所爭又只是些子能如此而察之非知幾者莫能又曰幾者動之微是欲動未動之間便有善惡便須就這處理會若到發出處更怎生奈何得所以聖賢說謹獨便都是要就幾微處理會○知微知彰知柔知剛是四件事○問知微知彰知柔知剛伊

川作見微則知彰矣見柔則知剛矣其說如何曰也好看來只作四體事亦自好既知微又知彰既知柔又知剛言其无所不知所以為萬民之望也○張子曰幾者象見而未形者也形則涉乎明不待神而後知也吉之先見云者順性命則所先皆吉也○漢上朱氏曰神難言也精義入神其唯知幾乎知幾其神矣幾者動之微吉之先見者也譬如陽生而井溫雨降而雲出衆人不識而君子見之○誠齋楊氏曰夫石者至靜而无欲至重而不動者也今也君子介然如石天下之可欲者何物能動之乎其見幾寧用終日而後識之乎○雙湖胡氏曰豫六二爻唯曰介于石不終日貞吉而夫子發明幾學以教人蓋介有幾義倪寬謂至纖至細處者深為得之上交謂五下交謂初唯當豫時不詔不瀆不沉溺於豫此其所以為知幾也○臨川吳氏曰穆生得免申白之禍者能見幾而作也劉桢竟陷伍文之黨者不能見幾而作也

子曰顏氏之子其殆庶幾乎有不善未嘗不知知之未

嘗復行也易曰不遠復无祇悔元吉

復行之復
扶又反

本義殆危也庶幾近意言近道也此釋復初九爻義

朱子曰其殆庶幾乎殆是幾字之義又曰是近義又曰殆是危殆者是爭些子底意思或以幾為因上文幾字而言但左傳與孟子庶幾兩字都只做近字說○顏子有不善未嘗不知知之未嘗復行今人只知知之未嘗復行為難殊不知有不善未嘗不知是難處今人亦有說道知得這箇道理及事到面前又却只隨私欲做將去前所知者都自忘了只為是不曾知有不善未嘗不知知之未嘗復行直是顏子天資好如至清之水纖芥必見○李氏椿年曰聖人无不善賢人則容有不善但未嘗不知知之未嘗復行也

○臨川吳氏曰程子云顏子无形顯之過夫子謂其庶幾未能不勉而中所欲不踰矩是有過也然其明而剛故一有不善未嘗不知既知未嘗不遽改乃不遠復也過既未形而改何悔之有復者陽反來復也陽君子之道故復為反善之義初陽來復處卦之初復之最先不遠而復者也失而後有復唯失之不遠而復則不至于悔也

天地絪縕萬物化醇男女構精萬物化生易曰三人行

則損一人一人行則得其友言致一也

絪音因縕紓云反

本義絪縕交密之狀醇謂厚而凝也言氣化者也化

生形化者也此釋損六三爻義

朱子曰天地絪縕言氣化也男女構精言

形化也致一專一也唯專一所以能網緼若不專一則各自相離矣化醇是已化後化生指氣化而言草木是也○天地男女都是兩箇方得專一若三箇便亂了三人行減了一箇則是兩箇便專一一人行得其友成兩箇便專一程子說初與二三與上四與五皆兩相與自說得好○臨川吳氏曰網緼者氣之交也樁精者形之交也天地之二氣交故物之以氣化者其氣醲厚而能醇男女之二氣交故物之以形化者其精凝聚而能生此氣形之相交以二與三人損一一人得友之相合以二者其理同皆言其以一合一故能致一而不二也○漢上朱氏曰天地萬物其本一也天地升降其氣網緼萬物化矣醇而未離言其一而未始離也天地既生萬物萬物各有陰陽精氣相交化生无窮男女曰化生者言有兩則有一也○建安丘氏曰損自泰來以未成卦言之下乾為天上坤為地以乾上三爻交坤下三爻而為損有天地

網緼之象以既成卦言之上坤變艮艮為少男下乾變兌兌為少女有男女構精之象○張子曰虛則受盈則虧陰陽之義也故陰得陽則為益以其虛也陽得陰則為損以其盈也艮三索而得男乾道之所以成也兌三索而得女坤道之所以成也故三之於上則有天地網緼男女構精之義

子曰君子安其身而後動易其心而後語定其交而後求君子修此三者故全也危以動則民不與也懼以語則民不應也无交而求則民不與也莫之與則傷之者

至矣易曰莫益之或擊之立心勿恆凶

易其之易以政反

本義此釋益上九爻義

朱子曰心平氣和則能言易其心而後語謂平易其心而

後語也○上下繫說許多爻直如此分明他人如說得分明便淺近聖人說來却不淺近有含蓄所以分在上下繫也○融堂錢氏曰安其身易其心定其交非立處說爾○心有恆者不能然立心有恆種種周密缺一便不謂全○平庵項氏曰危以動則民不與者黨與之與也○元交而求則民不與者取與之與也○柴氏中行曰身順道則安悖道則危心无險陂則易有險陂則懼以義相與為交定以利相與為无交動而與語而應求而與者物我一心而无間之者也小人反是獨言其之與則傷之者至矣以益之上九專利自益故也

右第五章

雙湖胡氏曰夫子於繫辭上傳既舉七卦爻辭以發明易道今於此章復舉十

卦十一爻之辭以論之看來亦只是隨一時意之所欲言者則舉之逐爻各自有意義皆足為學

者取法未必先立主意却以卦實之也○雲峰
胡氏曰上繫七爻下繫十一爻皆象傳之文言

也學易者可觸
類而通其餘矣

子曰乾坤其易之門邪乾陽物也坤陰物也陰陽合德

而剛柔有體以體天地之撰以通神明之德

撰撰仕勉反

程子曰或曰乾坤易之門其義難知餘卦則易知也
曰乾坤天地也萬物烏有出天地之外者乎知道者
統之有宗則然也而在卦觀之乾坤之道簡易故其
辭平直餘卦隨時應變取舍无常至為難知也知乾
坤之道者以
為易則可也

本義諸卦剛柔之體皆以乾坤合德而成故曰乾坤

易之門撰猶事也

朱子曰乾坤易之門不是乾坤外別有易只易便是乾坤乾坤便是

易似邪兩扇門相似一扇開便一扇閉只是一箇陰陽做底如閤戶謂之坤開戶謂之乾○問門者是六十四卦皆由是出如兩儀生四象只管生出故曰門邪為復是取閤開之義邪曰只是取閤開之義六十

四卦只是這一箇陰陽閤開而成但看他下文云乾陽物也坤陰物也陰陽合德而剛柔有體便見得只是這兩箇○乾陽物坤陰物陰陽形而下者乾坤形而上者天地之撰即是說他做處○進齋徐氏曰陽

畫為乾陰畫為坤門猶閤戶開戶之義一閤一開為易之門其變元窮皆二物也陰陽合德謂二物交錯而相得有合剛柔有體謂成卦爻之體也天地之撰陰陽造化之迹也有形可擬故曰體體天地之撰言聖人作易皆以體法造化之事而效其至著者也神明之德陰陽健順之性也有理可推故曰通通神明

之德言易晝既作又以通知造化之理而極於至微者也又曰自形而上者言之故先陰而後陽自形而下者言之故先剛而後柔○凌氏曰乾坤物於陰陽而由陰陽以闔闢故曰乾陽物也坤陰物也○節齊蔡氏曰乾坤合而後成衆卦爻之體如剛來而下柔剛上而柔下此類皆由乾坤相合而成所謂陰陽合德而剛柔有體也○雲峰胡氏曰其初也陰陽分而為兩儀陰陽之合則為四象八卦而剛柔於是乎有體著而天地之撰微而神明之德皆自乾開其始而坤成其終故曰乾坤易之門

其稱名也雜而不越於稽其類其衰世之意邪

本義萬物雖多无不出於陰陽之變故卦爻之義雖雜出而不差繆然非上古淳質之時思慮所及也故

以為衰世之意蓋指文王與紂之時也

或問其稱名也雜而不越

是指繫辭而言是指卦名而言朱子曰他後面兩三番說名後又舉九卦說看來只是謂卦名○問於稽其類曰但不過是說稽攷其事類○其衰世之意邪伏義畫卦時這般事都已有了只是未曾經歷到文王時世變不好古來未曾有底事都有了他一經歷這崎嶇萬變過來所以說出那卦辭如箕子之明夷如入于左腹獲明夷之心于出門庭此若不是經歷如何說○雲峰胡氏曰伏義三畫卦名自乾一至坤八有自然之序因而重之亦然至文王稱卦之名則雜而非復伏義之序矣然其稱名雖雜而於伏義之易未嘗差違稽類考占世之衰也蓋有不得不然者矣○柴氏中行曰乾坤足以盡天下之道萬物由之足矣何用不一之名世衰道微人之情偽滋熾聖人不得不明其道以示天下○進齋徐氏曰上古之

世俗朴民淳迷於吉凶之塗而莫知所趨故伏羲畫卦以教之占而吉凶以明斯民由之而无疑也雖乾陽坤陰剛柔交錯顯而體天地之撰微而通神明之德然剛勝則吉柔勝則凶亦未嘗費辭也中古以來人心變詐迷謬愈甚文王周公於是繫卦爻之辭辨名辨物稽類考占以開示陰陽之義易之道雖元蘊而聖人憂患後世之意蓋亦有不得已然者故下文又申言之

夫易彰往而察來而微顯闡幽開而當名辨物正言斷

辭則備矣

夫音扶當去聲斷丁亂反

本義而微顯恐當作微顯而開而之而亦疑有誤

朱子

曰彰往察來往者如陰陽消長來者事之未來吉凶問彰往察來如神以知來知以藏往相似往是已定

底如天地陰陽之變皆已見在只卦上了來謂方來之變亦皆在這上曰是○微顯闡幽幽者不可見便就這顯處說出來顯者便就上面尋其不可見底教人知得如此顯道神德行相似德行顯然可見者道不可見者微顯闡幽是將道來事上看言那箇雖是粗底然皆出於道義之蘊微顯所以闡幽闡幽所以微顯只是一箇物事○繫辭自此以後皆難曉○進齊徐氏曰往謂陰陽消長剛柔變化卦爻所藏者易皆著而明之故曰彰往來謂吉凶未定事之方來者占筮中所告可以前知故曰察來顯者微之使求其原故曰微顯幽者闡之使見其端故曰闡幽當名謂父子君臣之分貴賤上下之等各當其位也辨物謂乾馬坤牛離火坎水碩果苞陸之類悉辨其似也正言謂元亨利貞直方大之辭正其言以曉人也斷辭謂利涉大川不利涉大川可小事不可大事之語有以決其疑也○雲峰胡氏曰辨物正言斷辭後天之

易也視先天則為備矣○臨川吳氏曰彰往即藏往也謂明於天之道而彰明已往之理察來即知來也謂察於民之故而察知未來之事微顯即神德行也謂以人事之顯而本之於天道所以微其顯闇者闇而顯之也闇幽即顯道也謂以天道之幽而用之於人事所以闇其幽上篇之藏往知來顯道神德行兼著而言此則專以卦而言也

其稱名也小其取類也大其旨遠其辭文其言曲而中其事肆而隱因貳以濟民行以明失得之報

中丁仲反
行下孟反

本義肆陳也貳疑也

進齊徐氏曰負乘往來事名之小者也茅棘豕雉物名之小者

也所稱雖小而其所取之類皆本於陰陽非稱名也小取類也大乎旨謂所示之理文謂經緯錯綜也極

天下之賾凡天地陰陽道德性命之奧象皆示之而其所繫之辭經緯錯綜皆有自然之文非其旨遠其辭文乎曲委曲也凡委曲其文者未必皆中乎理易則言雖曲而无不中也肆陳也凡數陳其事者无有隱而不彰易則事雖肆而其理未嘗不隱也貳疑也報猶應也失得之報吉凶之應也因民之疑貳以決其疑以濟其所行有以明著其吉凶之應也○雲峰胡氏曰稱名雖小而取類於陰陽也甚大不可以淺近卑吾易也其旨雖遠而其文經緯可見不可以高遠荒吾易也其言雖委曲而又皆中於理易豈高遠之書哉其事雖橫陳而實本於至隱易豈淺近之書哉上古之時唯有易畫以明失得之報而民无疑至于求世不得不因民之疑而明之以辭矣○雙湖胡氏曰此一節上六句皆是抑揚說易書所載名雖小而類則大旨雖遠而辭則文言雖曲而理則中事雖肆而理則隱正與書直而溫寬而衆等語同意凡此

者元非因民心之疑貳而欲濟其所行以易而明示其失得之報故也○臨川吳氏曰自夫易以下至此皆論文王象辭雖取類之大辭之文事之肆而隱爻辭亦然而此則專為象辭言也

右第六章

本義此章多闕文疑字不可盡通後皆放此

湖雙

胡氏曰此章專論乾坤為易之門六十四卦之所從出乃易之關鍵也其究則无非所以斷民

疑明吉凶之報耳

易之興也其於中古乎作易者其有憂患乎

程子曰如言仁者不憂又却言作易者其有憂患須要知用處各別也天下只有一箇憂字一箇患字既

有此二字聖人安得无之

本義夏商之末易道中微文王拘於羑里而繫彖辭

易道復興

臨川吳氏曰中占謂文王時義皇之易有畫而已三畫之卦雖有名而六畫之卦未

有名文王始名六畫而繫之以辭易道幾微而至此復興也卦名及辭皆前所未有故不云述而云作作易在羑里時故云其有憂患乎蓋於其名卦而知其有憂患也下文舉九卦之名以見其憂患之意

是故履德之基也謙德之柄也復德之本也恒德之固也損德之修也益德之裕也困德之辨也井德之地也巽德之制也

本義履禮也上天下澤定分不易必謹乎此然後其德有以為基而立也謙者自卑而尊人又為禮者之所當執持而不可失者也九卦皆反身修德以處憂患之事也而有序焉基所以立柄所以持復者心不外而善端存恒者守不變而常且久懲忿窒慾以修身遷善改過以長善困以自驗其力井以不變其所

然後能巽順於理以制事變也

朱子曰履德之基只是要以踐履為本謙

德之柄只是要謙退若處患難而驕亢自高取禍必矣復德之本如孟子所謂自反因德之辨因而通則

可辨其是因而不通則可辨其非損是慙忿室慙益是修德益令廣大巽德之制巽以行權巽只是低心下意要制事須是將心入那事裏而去順他道理方能制事方能行權若心粗只從事皮膚上綽過如此行權便錯了巽伏也入也○問非德之地曰非有本故澤及於物而非未嘗動故曰居其所而遷如人有德而後能施以及人然其德性未嘗動也○問巽何以為德之制曰巽為資斧巽多作斷制之象蓋巽字之義非順所能盡乃順而能入之義謂巽一陰入在二陽之下是入細直徹到底不只是到皮子上如此方能斷得殺落而見得盡何不可以行權○進齋徐氏曰履踐也基猶基址禮卑如地人之踐履一循乎禮是從實地上立脚步步皆實則德有基基自下積累而上故曰德之基復為反善之義人非聖人不能不流於惡能於念慮之萌人所不知已所獨知之處審其幾而復於善焉是德有其本也人處困窮出處

語默之間取予辭受之際最可觀德當義則為君子
 違理則為小人明辨於斯所以自驗其所守也○雲
 峰胡氏曰夫子偶於上經取三卦下經取六卦言文
 王以憂患之心作易而文王處憂患之道自无非易
 也履之象上天下澤定分不易履之爻以一陰安處
 於三陽之下此履之所以為禮也謙之象地中有山
 不見其高謙之爻以一陽而退處於三陰之下此謙
 之所以制禮也復則一陽生於五陰之下天地之心
 可見本義所謂心不外而善存者指仁而言也如墉
 之基所以立也如器之柄所以執也文王之禮也如
 木之本所以生也文王之仁也恒德之固文王之心
 无時而非禮无時而非仁也損以懲忿窒慾益以遷
 善改過困以知命而取舍有辨井以定性而動靜不
 改其終也巽順於理以制事變文王蓋无適而非義
 也○雙湖胡氏曰此初陳九卦之德雖未說到聖人
 用易處然以文王之聖之德純亦不已其於九卦之

德固自統會於
其心也久矣

履和而至謙尊而光復小而辨於物恒雜而不厭損先
難而後易益長裕而不設困窮而通井居其所而遷巽

稱而隱

易以豉反長丁
丈反稱尺証反

程子曰益長裕而不設謂固有此理而就
上充長之設是撰造也撰造則為偽也

本義此如書之九德禮非強世然事皆至極謙以自
卑而尊且光復陽微而不亂於羣陰恒處雜而常德
不厭損欲先難習熟則易益但充長而不造作困身

困而道亨井不動而及物巽稱物之宜而潛隱不露

朱子曰履之為卦君臣上下各履其位而得其和者也。和則疑於平易而非極至之義。然各得其所而不亂焉。是乃所以和而至其下。八卦之說其例皆然。○履和而至以下每句皆是反說。如謙本以自卑却尊而且光。若泰人尊君卑臣則雖尊而不光。唯謙則尊而又光。○復小而辨於物者。蓋復卦是一陽方生於羣陰之下。如幽暗中一點白。是小而辨也。又曰復雖一陽方生。然而與衆陰却不相亂。如人之善端方萌。雖小然而衆惡却過他不得。○損先難而後易。如子產為政。鄭人歌之曰。孰殺子產。吾其與之。及三年人復歌而頌之。蓋事之初在我。亦有所勉強在人。亦有所難堪。久之當事順人心。這裏方易。便如利者義之和。一般義是一箇斷制物事。却似不和久之事得其宜。乃所以為和。如萬物到秋。許多嚴凝肅殺之氣。

似可畏然萬物到這裏若不得此氣收斂凝結許多
生意又无所成就其難者乃所以為易也蓋長裕而
不設長裕只是一事但充長自家物事教寬裕而已
困窮而通此因困卦說澤无水困君子以致命遂志
蓋此是致命遂志之時所以困之象曰陰以說困而
不失其所亨其唯君子乎蓋處困而能說也○井居
其所而遷又云井德之地也蓋井有定體不動然水
却流行出去不窮猶人心有持守不動而應變不窮
也德之地也地是指那不動底○巽稱而隱巽是箇
卑巽底物事如兌見而巽伏也自是箇隱伏底物事
蓋巽一陰在下二陽在上陰初生時已自稱量得箇
道理了不待顯而後見如事到面前自家便有一箇
道理處置他不待發露出來又曰稱而隱是巽順恰
好底道理有隱而不能稱量者有能稱量而不能隱
伏不露形跡者皆非巽之道也巽德之制也巽以行
權都是此意○問隱字何訓曰隱不見也如風之動

物无物不入但見其動而不見其形權之用亦猶是也
○節齋蔡氏曰和則不能必至而履之和則能至尊
者不能必先而謙之尊則能光微昧者不辨於物而
復之小則能辨雖者人厭之而恒之雜則不厭難者
不易而損先難則有後易之理設施為也裕則多施
為而益之裕則不施窮則不通而困之窮則能通遷
謂養物不窮也居其所則不遷而井之居則能遷稱
輕重等也稱則形著而巽之稱則能隱此如書之九
德蓋兼體用而言也○進齋徐氏曰設施為也自然
充長不待施為以求其益也益之道當俟其涌養從
容自然有得不可萌欲速助長之心設謂有所安排
布置要如何也○西山真氏曰損先難而後易益愈
心易發難制欲心易開難塞故其始也懲之塞之為
甚雖然天理既明人欲自熄其為力又有所不難者
故曰後易益長裕而不設蓋主利物而言長裕者謂
充廣吾寬裕之德則其利益自然及物不待安排做

作也故曰不設○雙湖胡氏曰此再陳九卦之材亦未說到聖人用易處然聖人既有九卦之德亦必有九卦之材其和而至稱而隱固其餘事矣

履以和行謙以制禮復以自知恒以一德損以遠害益

以興利困以寡怨井以辨義巽以行權和行之行下孟反遠袁萬反

程子曰巽以行權義理所順處所以行權

本義寡怨謂少所怨尤辨義謂安而能慮朱子曰三陳九卦初

无他意觀上面其有憂患一句便見得是聖人說處憂患之道聖人去這裏偶然看得這幾卦有這箇道理所以就這箇說去天下道理只在聖人口頭開口便是道理偶說此九卦意思自足若更添一卦也不

妨更不說一卦也不妨只就此九卦中亦自儘有道
理且易中儘有處憂患底卦非謂九卦之外皆非所
以處憂患也後世拘於象數之學者以為九陽數聖
人之舉九卦蓋合此數也尤泥而不通觀聖人之經
正不當如此若以因為處憂患底卦則屯塞非處憂
患而何又曰今之談經者徃徃有四者之病本卑也
而抗之使高本淺也而鑿之使深本近也而推之使
遠本明也而必使至於晦○禮主卑下履也是那踐
履處所行若不由禮自是乖戾所以曰履以和行謙
又更卑下所以節制乎禮又曰禮是自家恁地卑下
謙是應物而言○四以寡怨是得其處亨之道故无
所怨於天无所尤於人若不得其道則有所怨尤矣
○井以辨義辨義謂安而能慮蓋守得自家先定方
能辨事之是非若自家心不定事到面前安能辨其
義也○問巽有優游巽入之義權是仁精義熟於事
能優游以入之意曰是○巽是入細底意說在九卦

之後是這八卦事了方可以行權○問巽以行權曰
權之用便是如此見得道理精熟後於物之精微委
曲處无處不入所以說巽以行權又問恐是神道曰
不須如此說巽只是柔順低心下意底氣象人至行
權處不少巽順如何行得○巽以行權兌見而巽伏
權是隱然做底物事若顯然地做却不成行權此外
八卦各有所主皆是處憂患之道○雲峰胡氏曰謙
以制禮而履以和行則禮之至者也井以辨義而巽
以行權則義之精者也○邵子曰人道不能无怨故
言寡怨所謂怨是用希是也○柴氏中行曰道始於
踐履而終以知權故孔子以可與權為學之到○西
山真氏曰九卦之義更當各就全卦反覆觀之以求
夫所謂處憂患者庶乎得之又此章之下云易之為
書也不可遠又明於憂患與故則易之一書无非明
於憂患而處以道者又不特九卦為然也○雙湖胡
氏曰三陳九卦自有次第第一節論九卦之德第二

節論九卦之材第三節方論聖人用九卦以處憂患之道故皆以以字明之亦如六十四卦大象必著一以字以明用易也然文王之聖心與易會居平時處憂患无一非易况演易筮里即身是易豈待逐卦而以之乎夫子亦姑論其處憂患之道以其近似者言之而為萬世學易者之法矣苟膠焉不通則豈所謂哉易者

右第七章

本義此章三陳九卦以明處憂患之道

雲峰胡氏曰此

章三陳九德雖夫子偶即九卦言之然上經自乾至履九卦下經自恒至損益亦九卦上經履至謙五卦下經益至困井亦五卦上經謙至復又九卦下經井至巽又九卦上經自復而咸入

卦而為下經之恒下經自巽而未濟亦八卦復為上經之乾上下經對待又似非偶然者或於此可見文王之心焉對待凡十卦置乾不言乾為君也文王常存事君之小心而不知其有君民之大德者也九卦上下體无離文王晦其明者也然有互體離在焉實未嘗不明也

易之為書也不可遠為道也屢遷變動不居周流六虛

上下无常剛柔相易不可為典要唯變所適

遠袁萬反
上時掌反

本義遠猶忘也周流六虛謂陰陽流行於卦之六位

朱子曰易不可為典要易不是確定硬本子揚雄太玄却是可為典要他排定三百五十四贊當畫三百五十四贊當夜晝底吉夜底凶吉之中又自分輕重凶之中又自分輕重易却不然有陽居陽爻而吉底

又有凶底有陰居陰爻而吉底又有凶底有有應而吉底有有應而凶底是不可為典要之書也是有那許多變所以如此○上下元常唯變所適便見得易人人可用不是死法雖道是二五是中却其間有位二五而不吉者有當位而吉亦有當位而不吉者○三山林氏曰易之所言无非天地自然之理人生日用之不可須臾離者故曰不可遠○張子曰心不存之是遠也不觀其書亦是遠也○白雲郭氏曰人之於道不可須臾離也故於易不可遠可離者非道可遠者亦非易也○節齋蔡氏曰屢遷謂為道變通而不滯乎物自易之為書至屢遷此總言為書為道以起下文之意也自變動不居至唯變所適言易道之屢遷也不居猶不止也六虛六位也位未有爻曰虛卦雖六位而剛柔爻畫往來如寄非實有也故以虛言或自上而降或由下而升上下元常也柔來文剛分剛上而文柔剛柔相易也典常也要約也其屢變

无常不可為典要唯變所適而已○鶴山魏氏曰六畫六爻六位六虛四者相近而不同爻者動也專指九六則父母之策也畫者卦也兼七八九六則包男女之策也總而言之畫即為爻析而言之爻與畫異畫之見者又為位爻之變者又為虛故曰變動不居周流六虛位從爻而為虛也曰六畫成卦六位成章虛從畫而為位也然其實皆自奇耦之畫始奇耦則太極之分者也

其出入以度外內使知懼

本義此句未詳疑有脫誤

或問外內使知懼據文勢合作使內外知懼始得朱

子曰是如此不知此兩句是如何硬解時也解得去但不曉其意是解甚底上下文意都不相屬○漢上朱氏曰出入者以卦內外體言出者自內之外往也入者自外之內來也以是觀消息虛盈之變出處進

退之理使知戒懼當出而入當入而出其患一也

又明於憂患與故无有師保如臨父母

本義雖无師保而常若父母臨之戒懼之至

朱子曰使知懼

便是使人有戒懼之意易中說如此則吉如此則凶是也既知懼則雖无師保一似臨父母相似常恁地戒懼○南軒張氏曰師者教之道保者輔其躬○節齊蔡氏曰故所以也又明所當之憂患與致憂患之所以也是雖无師保亦如臨乎父母之側而愛敬之至此言易書之不可遠也○息齋余氏曰上繫雖言與民同患而必以洗心先之又發造化不與聖人同憂之意下繫則多言憂患矣

初率其辭而揆其方既有典常苟非其人道不虛行

揆

反矣

本義方道也始由辭以度其理則見其有典常矣然

神而明之則存乎其人也

朱子曰既有典常是一定了占得他這爻了吉凶自

定這便是有典常○凌氏曰率其辭之所指而揆其方之所向則其道雖不可為典要而其書則有典可循有常可蹈也然非得其人亦何以行之哉○節齋蔡氏曰此又合書與道而言也

右第八章

雙湖胡氏曰此章專論玩辭觀變為學易之事而深有望於其人也書者卦爻

之辭也道之屢遷者卦爻之變也此二句一章綱領變動不居以下言其變也明於憂患以下言其辭也自其變觀之則九六之爻周流於虛位之間或上或下而无常皆一剛一柔之相易

不可為典要而唯變所適然其剛柔之或上而出於外也既足為斯人之法度使知懼於外其剛柔之或下而入於內也亦足為斯人之法度使知懼於內豈徒變之云乎自其辭觀之則明於憂患而如父母之臨率辭揆方而有典常之可法而後總之以苟非其人道不虛行則玩辭觀變之學誠有望於其人也聖人之意可見矣

易之為書也原始要終以為質也六爻相雜唯其時物也

要一遙反下同

本義質謂卦體卦必舉其始終而後成體爻則唯其

時物而已

進齋徐氏曰此總言聖人作易所以立卦生爻之義下文又逐爻分說而申明之也

質謂卦體時謂六位之時物謂陰陽二物也原其事之始要其事之終以爲一卦之體質卦有六爻剛柔錯雜隨其時辨其物言卦雖有全體而爻亦无定用也○雲峰胡氏曰卦有定體故曰質爻无定用故曰時○錢氏藻曰六爻相雜唯其時之不同而其事物亦異如乾之取龍一物也或潛或見或躍或飛之不同者時也如漸之取鴻一物也而于干于磐于陸于木之不同者亦時也

其初難知其上易知本末也初辭擬之卒成之終

易以政反

本義此言初上二爻

節齋蔡氏曰初爻者卦之本本則其質未明故難知上爻者卦

之未末則其質已著故易知難知則所繫之辭必擬議而後得易知但卒其卦之辭而成其卦之終也○雲峰胡氏曰此承上文原始要終而言也原其始則初爻爲本質未明故難知要其終則上爻爲末質已

著故易知故初爻之辭必擬之而上爻之辭則成之矣○臨川吳氏曰初與終為對擬之與卒成之為對

兩句文法
顛倒相互

若夫雜物撰德辨是與非則非其中爻不備

扶夫音

本義此謂卦中四爻

朱子曰其初難知至非其中爻不備若解也硬解了但都曉他

意不得這下而却說一箇噫字都不成文章不知是如何後面說二與四同功三與五同功却說得好但不利遠者也曉不得○問雜物撰德辨是與非則非其中爻不備曰這樣處曉不得某常疑有闕文先儒解此多以為互體如屯卦震下坎上就中間四爻觀之自二至四則為坤自三至五則為艮故曰非其中爻不備互體說漢儒多用之左傳中一處說占得觀卦處亦舉得分明看來此說亦不可廢○問易中互

體之說或以為雜物撰德辨是與非則非其中爻不備此是說互體曰今人言互體皆以此為說但亦有取不得處如頤大過之類是也王輔嗣又言納甲飛伏尤更難理此等不必深泥○雲峰胡氏曰此承上文六爻相雜而言也六爻本自相雜二三四五於六爻之中又雜物撰德者如屯下震物為雷德為動上坎物為雲德為陰下互坤則雜物為地撰德為順矣上互艮則又雜物為山撰德為止矣亦可以辨是與非而易愈精矣○容齋洪氏曰如坤坎為師而六五之爻曰長子帥師以正應九二而言蓋指二至四為震也坤艮為謙而初六之爻曰涉大川蓋自二而上則六二九三六四為坎也○臨川吳氏曰內外既有二正卦之體中四爻又成二互體之卦然後其義愈无遺闕非以此正體互體並觀則其義猶有不備正體則二為內卦之中五為外卦之中互體則三為內卦之中四為外卦之中故皆謂之中爻○雙湖胡氏

曰是非者當位不當位中不中正不正也內外卦既足以示人矣復自互體而辨之則是是非非於是乎益可見焉○潘氏夢旂曰不言吉凶而曰辨是與非則吉凶可知矣

噫亦要存亡吉凶則居可知矣知者觀其彖辭則思過

半矣

知音

本義彖統論一卦六爻之體

臨川吳氏曰上文既分言初上二爻及中四爻

此又總六爻言之噫嘆美辭存亡者陰陽之消息吉凶者事情之得失要其存亡吉凶之所歸則六爻之義居然易見可指掌而知矣又謂知者能見事於未形雖不觀各爻之義但觀卦首之彖辭則所思已得十分之五六矣蓋彖辭或論二體或論主爻或論卦變相易之爻是以不待觀六爻而已可見也章首第

一句言象第二句總言六爻此一節又總言六爻而復歸重於象蓋為結語與章首起語相始終下文則又更端而言中四爻也○括蒼葉氏曰象者原始要終以為質者也故智者觀之无待於爻蓋所要愈約則所知愈易中四爻者六爻之要而象者又一卦之要也

二與四同功而異位其善不同二多譽四多懼近也柔之為道不利遠者其要无咎其用柔中也

要如字又一遠反下章同

奉義此以下論中爻同功謂皆陰位異位謂遠近不同四近君故多懼柔不利遠而二多譽者以其柔中

也

或問其要无咎其用柔中也近君則當柔和遠去則當有強毅剛果之象始得此二之所以不利然

而居中所以无咎朱子曰也是德地說○潘氏夢旂曰二與四功同乎陰而位有內外之異二遠於君雖在下而多與四近於君雖在上而多懼然陰柔之道遠則難援二之遠而大要无咎者以其雖柔而居下體之中也○雲峰胡氏曰上文雜物撰德是謂中爻之互體此則論中爻之本體二與四為陰陰以降為用故不成乎四退而成乎二柔雖不利遠者二陰成而得中故多與四近君若陰柔未成而不中故多懼○魯齋許氏曰二與四皆陰位也四雖得正而猶有不中之累況不得其正者乎二雖不正猶有得中之美況正而得中者乎四近君之臣也二遠君之臣也其勢又不同此二之所以多與四之所以多懼也

三與五同功而異位三多凶五多功貴賤之等也其柔

危其剛勝耶

勝音升

本義三五同陽位而貴賤不同然以柔居之則危唯

剛則能勝之

潘氏夢濟曰三與五功同乎陽而位有貴賤之異三以臣之賤而居下卦之上

故多凶五以君之貴而居上體之中故多功然五居位也柔居之則危剛居之則能勝其事故六居五多危九居五多吉也○雲峰胡氏曰三與五為陽陽以升為用故不成乎三獨進而成乎五五為貴又陽剛成而得中故多功三為賤又陽剛未成而不中故多凶其柔危其剛勝專為五言也於四不曰其剛危者九居四猶為剛而能柔者危者六居五則才柔而志剛所以危也○魯齋許氏曰上卦之中乃人君之位也一卦之德莫精於此在乾則剛健而斷在坤則重厚而順未或有先之者至於坎險之孚誠離麗之文明巽順於理艮篤於實皆能首出乎庶物不問何時克濟大事傳謂五多功者此也獨震忌強輔兌比小

人於君道為未善觀其
戒之之辭則可知矣

右第九章

雙湖胡氏曰此章專論爻畫以示人首
論六爻之始終次論爻之初上又次論

中四爻因及象辭末則申論中四爻分二四三
五陰陽而論以見遠近貴賤安危之不同而剛
柔之用亦具其致意在中四爻而四爻
之中所主又在二五居二體之中也

易之為書也廣大悉備有天道焉有人道焉有地道焉
兼三才而兩之故六六者非他也三才之道也

本義三畫已具三才重之故六而以上二爻為天中

二爻為人下二爻為地

漢上朱氏曰天地人三者一
物而兩體陰陽也而謂之天

剛柔也而謂之地仁義也而謂之人故曰三才兼三才而兩之故六兼之者天之道兼陰與陽也地之道兼柔與剛也人之道兼仁與義也六者非他即三才之道也是故三畫有重卦六即三三即一也○臨川吳氏曰一而不兩則獨而無對天獨陽而無陰地獨陰而無陽人之陰陽亦混而不分必皆兼而兩之天人地各有陰陽然後其道全而不偏所以重三畫之卦而為六畫者此也○誠齋楊氏曰重卦之後則兼三才而兩之是一三才為兩三才也合為一卦則陰或居上安知地之不為天陽或居下安知天之不為地五為君則天道為人道矣二為臣則地道為人道矣

道有變動故曰爻爻有等故曰物物相雜故曰文文不

當故吉凶生焉

當都浪反

本義道有變動謂卦之一體等謂遠近貴賤之差相

雜謂剛柔之位相間不當謂爻不當位

或問道有變動故曰爻爻

有等故曰物物相雜故曰文朱子曰道有變動不是指那陰陽老少之變是說卦中變動如乾卦六畫初潛二見三惕四躍這箇便是有變動所以謂之爻爻中自有等差或高或低或遠或近或貴或賤皆謂之等易中便可見如說遠近相取而悔吝生近而不相得則凶二與四同功而異位二多譽四多懼近也三與五同功而異位三多凶五多功貴賤之等也如列貴賤者存乎位皆是等也物者想見古人占卦必有箇物事名為物而今亡矣這箇物是那列貴賤辨尊卑底物相雜故曰文如有君又有臣便為君臣之文是兩物相對待在這裏故有文若相離去不相干便不成文矣卦中有陰爻又有陽爻相間錯則為文若

有陰无陽有陽无陰如何得有文○進齊徐氏曰卦之全體三才之道也道則變通不居如潛見躍龍之類皆道之變通而謂之爻爻也者效天下之動也或剛或柔而小大有等故謂之物物即陰陽二物也一不獨立二則為文陰陽兩物交相錯雜故謂之文陽居陽位陰居陰位當也陽居陰位陰居陽位不當也吉凶由是而生則可以觀變玩占而見其文之著矣○雲峰胡氏曰前章始以質言此章末以文言卦必舉始終而成體故曰質爻必雜剛柔以為用故曰文

右第十章

俱湖胡氏曰此章論易不徒爻畫有天地人之道具焉唯其有是道所以變動

不居即其為道也屢遷之義使徒有是爻而非有道寓於其間則亦何變動之有若物相雜則是因六爻中陰陽二物自相雜居而成文以生吉凶而為人事失得之象耳

易之興也其當殷之末世周之盛德邪當文王與紂之事邪是故其辭危危者使平易者使傾其道甚大百物不廢懼以終始其要无咎此之謂易之道也

易者之易以政反

本義危懼故得平安慢易則必傾覆易之道也

朱子曰其

辭危是有危懼之意故危懼者能使之安平慢易者能使之傾覆易之書於萬物之理无所不具故曰百物不廢其要无咎若作去聲則是要約之義若作平聲則是要其歸之意又曰要去聲是要其地要平聲是這裏取那裏意思又曰其要只欲无咎○柴氏中行曰非末世則情偽不如是之滋熾也非盛德則易道无自而傳也末世紂之事也盛德文王之事也文王之心憂患天下後世故其辭危懼此曰文王无辭

而論易道能使如此豈易使之邪殖有禮覆昏暴天之道也○節齊蔡氏曰易之道大百物皆不能廢也懼即憂危之謂苟能懼以終而猶始焉則要其終而无咎矣○進齊徐氏曰危者使平易者使傾然非有使之也天之生物必因材而篤焉故裁者培之傾者覆之亦自然之理也○雲峰胡氏曰文王以憂患之心作易故其辭危危懼故安平慢易故傾覆易之道雖廣大悉備不過使人懼以終始而已懼以始者易懼以終而猶始者難乾第一卦而曰君子終日乾乾夕惕若厲无咎此懼以終始其要无咎之說也

右第十一章

誠齊楊氏曰前言易興於中古作於憂患仲尼之意已屬之文王矣以為

未足也此章又明言易興於殷之末世周之盛德猶以為未足也又指而名之曰當文王與紂之事則無復秋毫隱情矣嗟夫千載之屈有幸逢一朝之伸一家之私有不沒天下之公文王

无遇於紂而有遇於仲尼其千載之屈一朝之
伸歟紂殷王也仲尼殷後也而仲尼貶殷為末
世褒周為盛德拊紂之名而不諱稱文王之王
而不抑其不以一家之私沒天下之公歟大哉
文王之聖歟大哉仲尼之公歟○雙湖胡氏曰
夫子原易之作明拊伏羲原易之興明拊文王
口書卦因重辭危可謂萬世之日
月獨少一言以及周公之爻惜哉

夫乾天下之至健也德行恒易以知險夫坤天下之至

順也德行恒簡以知阻

行下孟反易以
致反阻莊呂反

本義至健則所行无難故易至順則所行不煩故簡

然其於事皆有以知其難而不敢易以處之也是以

其有憂患則健者如自高臨下而知其險順者如自下趨上而知其阻蓋雖易而能知險則不陷於險矣既簡而又知阻則不因於阻矣所以能危能懼而无

易者之傾也

或問乾是至健不息之物經歷艱險處多雖有險處皆不足為其病自然足以

進之而危難否朱子曰不然舊亦嘗如此說覺得終是硬說易之書本意不如此正要人知險而不進不說是恃我至健至順了凡有險阻只認冒進而无難如此大非聖人作易之意觀上文云易之興也其當殷之末世周之盛德耶當文王與紂之事耶是故其辭危危者使平易者使傾其道甚大百物不廢懼以終始其要无咎此謂易之道也看他此語但是恐懼危險便不敢輕進之意乾之道便是如此卦中皆然

所以多說見險而能止如需卦之類可見易之道正是要人知進退存亡之道若是冒險前進必陷於險是知進而不知退知存而不知亡豈乾之道耶唯其至健而知險故止於險而不陷於險也此是就人事上說險與阻不同險是自上視下見下之險故不敢行阻是自下觀上為上所阻故不敢進又曰自山下上山為阻故指坤而言自山上觀山下為險故指乾而言因登山而明險阻之義又曰乾雖至健知得險了却不去去坤雖至順知得阻了更不上去○此段專是以憂患之際而言且如健當憂患之際則知險之不可乘順當憂患之際便知阻之不可越這都是知憂患之際處憂患之道當如此因憂患方生那知險知阻若止就健順上看便不相似如上下文說危者使平易者使傾能說諸心能研諸慮皆因憂患說大要乾坤只是循理而已他若知得前有險之不可乘而不去則不陷於險知得前有阻之不可冒而不可

去則不用於阻若人不循理以私意行乎其間其過乎剛者雖知險之不可乘却硬要乘則陷於險矣雖知阻之不可越却硬要越則困於阻矣只是順理使无事又問在人固是如此以天地言之則如何曰在天地自是无險阻這只是大綱說箇乾坤底意思是如此又曰順自是畏謹宜其不越夫阻夫健却疑其不畏險然却知險而不去蓋他常憂患之際故也又問簡易口若長是易時更有甚麼險他便不知險矣若長是簡時更有甚麼阻他便不知阻矣只是當憂患之際方見得○南軒張氏曰健者疑若不知險也今乾至健而德行恒易故知險而不為陰所陷順者疑若不知阻也今坤至順而德行恒簡故知阻而不為陽所拒○漢上朱氏曰上繫言易簡而天下之理得下繫終之以易簡而知險阻故曰殊塗而同歸一致而百慮○雲峰胡氏曰前言乾坤之易簡此言乾坤之所以為易簡蓋乾之德行所以恒易者何也乾

天下之至健也坤之德行所以恒簡者何也坤天下之至順也乾健而易宜无陰矣坤順而簡宜无阻矣此復曰險阻者為上又有憂患而言也下危曰險乾在上也上難曰阻坤在下也以乾坤健順而又曰險阻易之辭危也健而知險則其健也不能知險阻而阻則其順也不阻此危者之所平也不能知險阻而或陷焉此易者之使傾也聖人憂患之意至矣哉

能說諸心能研諸侯之慮定天下之吉凶成天下之亹

亹者

說音悅

本義侯之二字衍說諸心者心與理會乾之事也研

諸慮者理因慮審坤之事也說諸心故有以定吉凶

研諸慮故有以成亶亶

朱子曰能說諸心是凡事見得通透了自然懽悅既說諸

心是理會得了於事上更審一審便是研諸慮研是去研磨他○能說諸心乾也能研諸慮坤也說諸心有自然底意思故屬陽研諸慮有作為底意思故屬陰定吉凶乾也成亶亶坤也事之未定者屬乎陽定吉凶所以為乾事之已為者屬乎陰成亶亶所以為坤大抵言語兩端處皆有陰陽如開物成務開物是陽成務是陰如致知力行致知是陽力行是陰周子之書屢發此意推之可見又曰定吉凶是陽成亶亶是陰且以做事言之吉凶未定時人自意思懶散不肯做去吉凶定了他自勉勉做將去所以屬陰大率輕清屬陽重濁屬陰成亶亶是做將去涉於事為故屬陰○定天下之吉凶是剴判得這事成天下之亶亶亶是做得事業○平庵項氏曰唯乾坤知之明故能道占者之心使之說能因占者之慮為之研○漢上

朱氏曰天下之吉凶藏於九形至難定也天下之壘
壘來而不已至難成也定之成之者易簡而已○雲
峰胡氏曰理悟而心悅乾之事也故有以定吉凶事
來而慮研坤之事也故有以成壘壘此言易之辭危
而能使人
如此也

是故變化云為吉事有祥象事知器占事知來

本義變化云為故象事可以知器吉事有祥故占事

可以知來

朱子曰此節上兩句是說理如此下兩句
是人就理上知得在陰陽則為變化在人

事則為云為吉事自有祥兆唯其理如此故於變化
云為則象之而知已有之器於吉事有祥則占之而
知未然之事也○問凡見於有形之實事者皆為器
否曰易中器字是恁地說○問易書之中有許多變

化云為又吉事皆有休祥之應所以象事者於此而知器占事者於此而知來曰是○問變化云為主於人而言否曰變化者陰陽之所為云為者人事之所作○變化云為是明吉事有祥是幽象事知器是人占事知來是筮象事知器是人做這事去占事知來是他方有箇禎祥便占得他如中庸言必有禎祥見乎蓍龜之類吉事有祥凶事亦有○息齊余氏曰變化云為吉事有祥不假象占者也象事知器占事知來求諸象占者也不假象占百姓之所以與能也○雲峰胡氏曰在天道為變化在人事為云為人事與天道相符則吉事有祥矣此言易之理如此也如變化云為則象之而知其已形之器於吉事有祥則占之而知其未形之事此言人於易之理可以知其如此也

天地設位聖人成能人謀鬼謀百姓與能

與音

程子曰天地設位聖人成能日行乎天地之中所以為三才天地本一物也地一天也只是人為天地心是心之動則分了天為上地為下兼三才而兩之故六也

本義天地設位而聖人作易以成其功於是人謀鬼

謀雖百姓之愚皆得以與其能

朱子曰天地設位四句說天人合處天地

設位使聖人成其功能人謀鬼謀則雖百姓亦可以與其能成能與能雖大小不同然亦是小小底造化之功用然百姓與能却須因著龜而方知得百姓无知同卜筮便會做得事人謀鬼謀猶洪範之謀及卜筮卿士庶人相似○雲峰胡氏曰天地有此理不能以告人聖人作為卜筮之書明則謀諸人幽則謀諸鬼百姓亦得以與其能此聖人所以成天地之能也聖人成天地所不能成之能百姓得以與聖人

所已成之能也○臨川吳氏曰健順易簡知險知阻此天地之能說心研慮定吉凶成疊疊此聖人之能而成天地之能也云為之祥象占之知此百姓之能而與聖人之能者也

八卦以象告爻象以情言剛柔雜居而吉凶可見矣

本義象謂卦畫爻象謂卦爻辭

朱子曰八卦以象告以後說得叢雜不知

如何○張子曰八卦有體故象在其中錯綜為六十四卦爻象所趨各異故曰情言○南軒張氏曰八卦成列象在其中矣此八卦所以告人以象至於爻者變也象者材也皆有辭者此聖人以情而言於人也剛柔雜居則交通以趨時而或失或得故吉凶見焉○雲峰胡氏曰以象告者先天之易也以情言者後天之易也剛柔雜居而吉凶可見上古觀之於象可見後世非爻象以情言不可也

變動以利言吉凶以情遷是故愛惡相攻而吉凶生遠
近相取而悔吝生情偽相感而利害生凡易之情近而
不相得則凶或害之悔且吝

惡鳥
路反

本義不相得謂相惡也凶害悔吝皆由此生

或問易
之情近

而不相得則凶或害之悔且吝是如何朱子曰此疑
是指占法而言想古人占法更多今不見得蓋遠而
不相得則安能為害唯切近不相得則凶害便能相
及如一箇凶人在五湖四海之外安能害自家若與
之為鄰近則有害矣又問此如今人占火珠林課底
是凶神動與世不相干則不能為害性是克世應世
則能為害否曰恐是這樣意思○平庵項氏曰上文
言剛柔離居而吉凶可見則象之所以示人者明矣

變動以利言吉凶以情遷此再言辭之論人者殊也是故愛惡相攻以下皆言吉凶以情遷之事而以六爻之情與辭明之吉凶悔吝利害之三辭分出於相攻相取相感之三情而總屬於相近之一情此四相者爻之情也命辭之法必各象其爻之情故觀其辭可以知其情利害者商略其事宜有利有不利也悔吝則有迹矣吉凶則其成也故總而名之曰吉凶相感者情之始交故以利害言之相取則有事矣故以悔吝言之相攻則其事極矣故以吉凶言之遠近情偽姑就淺深分之若錯而總之則相攻相取相感之人其居皆有遠近其行皆有情偽其情皆有愛惡也故總以相近一條明之近而不相得則以惡相攻而凶生矣以偽相感而害生矣不以近相取而悔吝生矣是則一近之中備此三條也凡爻有比爻有應爻有一卦之主爻皆情之當相得者也今稱近者止據比爻言之反以三隅則遠而為應為主者亦必備此

三條矣但居之近者其吉凶多故聖人禁以近者
明之○進齊徐氏曰易道變動開闢物成務以利言也
而卦爻之辭有吉有凶以其情之有所遷耳愛惡相
攻如訟九四不克訟復即命以與初相受也謙六五
利用侵伐上六利用行師以與九三相受也同人九
三伏戎于莽惡九五也九五大師克相遇惡三四也
遠近相取如姤九五以杞包瓜上九始其角遠取初
六也解六三負且乘近取二四也豫六三盱豫近取
九四也情偽相感如中孚九二鳴鶴在陰以情感乎
五也屯六四求婚媾往以情感乎初也蒙六三見金
夫不有躬以偽感乎二也漸九三夫征不復婦孕不
育以偽感乎四也凡此皆以情遷者也○臨川吳氏
曰爻象以情言象與爻皆言情也吉凶以情遷則情
專屬爻而不及象何也蓋變動以利言利亦自情而
生也象亦有情爻亦有利互文也不相得謂無相攻
偽相攻近不相取則愛相攻情相感近相取為相得

矣不相得則凶害悔吝其相得則吉利悔亡无悔无咎從可知也夫子之已言者三其未言者三總之凡六條然此據近之比爻言爾若遠之應爻及主爻亦當各備六條總之為十八條矣愚嘗以此十八條之例考之爻辭皆合乃知作傳聖人以此該括易之情至為精密而諸家注釋唯項氏能究其底蘊焉

將叛者其辭慙中心疑者其辭枝吉人之辭寡躁人之

辭多誣善之人其辭游失其守者其辭屈

本義卦爻之辭亦猶是也

朱子曰中心疑者其辭枝中心疑故不敢說殺其辭

枝者如木之有枝開兩岐去○問此章切疑自吉凶可見矣而上只是總說易書所載如此自變動以利言而下則專就人占時上說如何曰然○節齋蔡氏曰漸三所繫將叛者之辭也睽上所繫中心疑者之辭

也臨二所繫吉人之辭也睽三所繫躁人之辭也中孚三所繫誣善之人之辭也節上所繫失其守者之辭也○平廣項氏曰六辭之中吉一而躁叛疑誣失居其五叛非叛逆但背實棄信皆是也言與實相背故慙吉者靜躁者動叛者无信疑者不自信誣者服人失守者自敗皆相反對也守謂其所依據吳王失國故辭屈於晉夷之失對故辭屈於孟子皆失其所據也以類推之艮吉也震躁也兌叛也巽疑也坎喜陷為誣善離喜麗為失守人情大約不出乎六者仁者默勇者謹能言者寡信善異者少決智人多險文士罕守剛柔之變其盡於此矣○雲峰胡氏曰未及六辭則謂非特象爻之辭可以見其情人之辭亦可以占其情使人又由易以知言也○進齋徐氏曰叛背叛也背叛正理其中有歎則發於言辭自然慚忤也枝如木之有枝間兩岐疑者可否未決則其辭不宜戡或兩岐也誣善者謂謗善為惡言語不實如物

在水上浮游不定失其守者言見理不定无所操執其辭多屈而不伸言心之聲由乎中而見乎外也孟子詖淫邪遁一章意亦如此○臨川吳氏曰易之辭皆由情而生人之辭亦由情而生故此又以人譬之本義云卦爻之辭亦由是也此篇首章云繫辭焉而命之又云聖人之情見乎辭蓋唯聖人能因易之情而繫易之辭是為一篇始終之脈絡云○息齋余氏曰上繫以默而成之不言而信存乎德行為結下繫以諸辭之不同者為結義相發也吉人辭寡其默成之次歟

右第十二章

周易傳義大全卷二十三